

IMAN DAN ISLAM

Oleh:

Ibrahim Bin Hj. Abdullah
Jabatan Pengajian Am, Politeknik Merlimau

PENDAHULUAN

Islam datang dalam keadaan manusia melakukan kejahatan dan kesesatan dari jalan Allah sehingga mereka terpesong daripada landasan yang sebenar dengan melakukan penyembahan selain daripada Allah. Bahkan mereka juga menjadikan patung-patung yang mereka sembah sebagai tuhan-tuhan mereka. Perbuatan dan amalan yang mereka lakukan sangat rugi bahkan tidak sedikitpun memberi kebaikan dalam kehidupan. Sebagaimana firman Allah bermaksud: "Demi masa sesungguhnya manusia itu berada dalam kerugian melainkan orang-orang yang beriman dan beramal soleh". Al-'Asr :104 (1-3).

RASUL SEBAGAI UTUSAN

Allah yang maha pengasih dan penyayang terhadap hambaNya telah mengutuskan rasul untuk menyelamatkan mereka daripada segala kesesatan dan membawa sinar kehidupan daripada kegelapan kepada cahaya, kesesatan kepada petunjuk demi untuk menyelamatkan manusia di akhirat nanti. Di antara dakwah yang di bawa oleh baginda nabi Muhammad s.a.w adalah berteraskan kepada beberapa prinsip iaitu:

- i. Konsep ketuhanan
- ii. Berita gembira dan menakutkan.
- iii. Kisah balasan Allah s.w.t terhadap musuh para rasul
- iv. Membentuk syakhsiyah dan peribadi yang unggul

Konsep ketuhanan adalah menjadikan Allah sebagai tempat yang disembah dan megakui Allah s.w.t berkuasa menjadikan sesuatu. Hubungan tauhid rububiyah dan uluhiyyah merupakan konsep yang tidak dapat dipisahkan oleh manusia yang mengakui kehebatan dan kebesaran Allah yang menjadikan segala sesuatu. Begitu juga dengan berita ghaib ianya tidak dapat diketahui melainkan melalui rasul yang diutuskan seperti syurga, neraka, kebangkitan dan pembalasan.

Dakwah baginda juga menceritakan balasan Allah s.w.t terhadap musuh para rasul sebagaimana yang berlaku kepada kaum 'Ad dan Thasud yang dibinasakan Allah kerana tidak beriman. Dengan ini peribadi merupakan nadi dalam membangunkan insan untuk menjadikan mereka insan yang soleh dan muslim.

Dengan kejayaan dakwah yang dibawa oleh baginda nabi Muhammad s.a.w. terdapat di kalangan sahabat nabi yang sanggup meninggalkan segala kemewahan hidup demi Islam. Sebagai contoh seorang anak muda yang bernama Mus'ab bin Umair yang sebelum ini seorang pemuda Quraisy yang mempunyai kemewahan dan tampan sanggup meninggalkan kemewahan demi akidah dan perjuangan Islam yang sudi walaupun mendapat tentangan hebat daripada ibunya sendiri. Tetapi kecintaannya terhadap Allah s.w.t. dan rasul mengatasi segala-galanya.

Sayyidina Umar al-Khattab yang semasa zaman jahiliyahnya terkenal dengan sifat keberanian tetapi dengan lahirnya Islam dan mukjizat al-Quran hatinya yang sebelum ini menentang setiap perjuangan baginda nabi Muhammad s.a.w akhirnya menjadi khalifah Islam yang terbilang.

Beliau merasakan dirinya begitu lemah bila mendengar bacaan al-quran yang menusuk ke dalam jiwa. Akhirnya beliau berjumpa dengan nabi Muhammad s.a.w.lalu menyatakan keislamannya dengan mengucapkan kalimah sahadah di hadapan nabi s.a.w. dan para sahabat. Inilah sifat mukmin sejati sebagaimana yang disebut di dalam al-quran yang bermaksud: " Sesungguhnya orang-orang mikmin apabila disebut nama Allah s.w.t hati mereka gementar dan apabila dibacakan kepada mereka ayat-ayat Allah s.w.t. bertambah iman mereka dan kepada Allah mereka berserah". Al-anfal :8 (2)

Panduan dan petunjuk yang dibawa oleh rasulullah s.a.w. adalah melalui jalan-jalan hikmah dan bijaksana serta terang samaada melalui dalil akal dan juga naqli menjadikan Islam itu diterima secara keseluruhannya. Allah telah mengangkat darjat serta kedudukan orang-orang beriman dengan beberapa kelebihan sebagaimana firman Allah yang bermaksud: "Allah mengangkat darjat orang-orang yang beriman di kalangan kamu dan orang-orang yang berilmu diberikan beberapa kelebihan dan Allah maha mengetahui apa yang kamu lakukan" Al-Mujadah: 85 (11)

PENUTUP

Keimanan yang teguh yang disertai dengan akhlak yang terpuji akan membuahkan tauhid yang ikhlas. Akhirnya melahirkan mukmin sejati yang mengetahui nilai kehidupan yang abadi. Nilai dan kemuliaan yang tinggi inilah yang dihayati oleh setiap insan demi mencapai kebahagiaan yang hakiki.

RUJUKAN

Al-Quran Al-Karim